

PEMBERITAHU PERTANYAAN DEWAN RAKYAT

PERTANYAAN : LISAN

DARIPADA : Y.B. Tan Sri Datuk Seri Panglima Annuar bin Musa [Ketereh]

TARIKH : 18.3.2014

SOALAN :

Y.B. Tan Sri Datuk Seri Panglima Annuar bin Musa [Ketereh] minta **MENTERI PENDIDIKAN** menyatakan apakah dasar Kementerian berhubung penghantaran pelajar ke negara Mesir di masa akan datang dan apakah usaha Kementerian dalam membantu pelajar yang terpaksa pulang dan menyambung pelajaran dalam negara akibat kekacauan yang berlaku di negara berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, atas sebab-sebab keselamatan, buat masa ini, Kementerian Pendidikan Malaysia (KPM) tidak menggalakkan pelajar-pelajar menyambung pengajian ke negara-negara yang bergolak termasuklah ke Mesir. Pada 20 Februari 2014, Kementerian Luar Negeri (KLN) telah mengemas kini *travel advisory* berhubung keadaan di Mesir di mana rakyat Malaysia adalah disarankan untuk tidak ke Mesir memandangkan keadaan di Mesir yang masih tidak stabil. Kedutaan Besar Malaysia Kaherah bersama Education Malaysia Mesir sentiasa memantau keselamatan pelajar Malaysia dengan menasihati mereka supaya tidak terlibat dengan mana-mana perhimpunan luar dan dalam kampus atau berada di kawasan yang bergolak.

KPM telah melaksanakan program pengurusan risiko bagi pelajar Malaysia di Mesir ekoran krisis Mesir 2013. Kerajaan Malaysia telah melaksanakan proses

evakuasi membawa pulang seramai 2,791 orang pelajar. Selaras dengan keputusan Jemaah Menteri pada 18 September 2013, Jawatankuasa Pengurusan Pengajian Pelajar Malaysia dari Mesir (JPPPMM) telah memproses permohonan pelajar Malaysia di Mesir untuk melanjutkan pengajian di IPT di Malaysia bagi sesi 2013/2014 dalam bidang perubatan, pergigian, farmasi (pemindahan kredit *parallel*) dan pengajian Islam secara *one-off*.

JPPPMM juga telah mencadangkan satu alternatif bagi meringankan beban pelajar dengan membenarkan dwi pinjaman iaitu Perbadanan Tabung Pendidikan Tinggi Nasional dengan jumlah pinjaman maksimum RM150,000 dan pinjaman dari mana-mana agensi lain. JPPPMM juga telah memberi kelonggaran nisbah pensyarah-pelajar dari 1:4 kepada 1:8 dalam bidang perubatan, pergigian dan farmasi serta kelonggaran kelayakan akademik. Pelajar yang memperolehi minimum gred B bagi lapan (8) subjek dalam Sijil Pelajaran Malaysia kepada satu subjek gred C kecuali subjek Biologi dan Kimia boleh memohon untuk menyambung pengajian di institusi pengajian tinggi swasta. Penempatan pelajar adalah tertakluk pada kekosongan kuota dan syarat-syarat sedia ada yang diguna pakai oleh badan-badan profesional secara *one-off*.

Rjm32